

BOSNA I HERCEGOVINA

Brčko distrikt BiH

SKUPŠTINA

BRČKO DISTRIKTA BiH



БОСНА И ХЕРЦЕГОВИНА

Брчко дистрикт БиХ

СКУПШТИНА

БРЧКО ДИСТРИКТА БиХ

Mladena Maglova 2, 76100 Brčko distrikt BiH, telefon i faks: 049/215-516

Младена Маглова 2, 76100 Брчко дистрикт БиХ, тел. и факс: 049/215-516

Na osnovu člana 22 Statuta Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj 2/10-prečišćeni tekst), Skupština Brčko distrikta Bosne i Hercegovine na I nastavku 22. redovne sjednice održanom 17. decembra 2025. godine, usvaja

ZAKON
O IZMJENAMA I DOPUNAMA ZAKONA O DJEČIJOJ ZAŠTITI
BRČKO DISTRIKTA BOSNE I HERCEGOVINE

Član 1

U Zakonu o dječijoj zaštiti Brčko distrikta Bosne i Hercegovine („Službeni glasnik Brčko distrikta Bosne i Hercegovine“, brojevi: 18/20 - prečišćen tekst, 29/20, 41/20, 13/21, 17/23 i 8/25) član 2 mijenja se i glasi:

„Član 2

- (1) Podnosilac zahtjeva po ovom zakonu može biti roditelj, staratelj, hranitelj, usvojitelj ili punoljetno lice bez roditeljskog staranja, ukoliko se nalazi na redovnom školovanju.
- (2) Podnosilac zahtjeva iz stava 1 ostvaruje pravo po ovom zakonu ako ima prebivalište na području Brčko distrikta Bosne i Hercegovine (u daljem tekstu: Distrikt) najmanje tri godine neprekidno prije podnošenja zahtjeva, u skladu s članom 11 Statuta Brčko distrikta Bosne i Hercegovine, pri čemu kontinuirano praćenje i uvid u prijavljenu adresu mjesta prebivališta podnosioca zahtjeva vrši Pododjeljenje za socijalnu zaštitu.
- (3) Prebivalište se dokazuje uvjerenjem nadležnog organa.“

Član 2

U članu 12 stavu 2 riječi: „dvije godine“ zamjenjuju se riječima: „ tri godine“.

Član 3

Član 13 mijenja se i glasi:

„Član 13

Pravo na dodatak za djecu, kao novčano davanje, ima podnosilac zahtjeva koji:

- a) ispunjava uslove propisane u članu 2 stavu 2 ovog zakona i
- b) nije korisnik dodatka za djecu u drugom entitetu ili drugoj državi.“

Član 4

Član 14 mijenja se i glasi:

„Član 14

(1) Pravo na dodatak za djecu ima svako dijete, bez obzira na imovinski i socijalni status porodice, od rođenja do navršene osamnaeste (18.) godine života, uz obavezu da se djeca starija od sedam (7) godina života nalaze na redovnom obrazovanju u osnovnim školama.

(2) Pravo na uvećani dodatak za djecu, koji u sebi sadrži i iznos dodatka za djecu iz stava 1 ovog člana, ostvaruju:

- a) djeca iz porodica sa niskim primanjima i to:
 - 1) podnosilac zahtjeva koji u domaćinstvu ima četiri i manje članova čija ukupna primanja su manja od više najniže plate iz oba entiteta bez obzira u kom entitetu su prijavljeni na penziono i invalidsko osiguranje;
 - 2) podnosilac zahtjeva čije domaćinstvo broji više od četiri člana, a čija plata je viša od najniže plate iz oba entiteta, bez obzira u kom entitetu su prijavljeni na penziono i invalidsko osiguranje, pod uslovom da ukupna mjesečna primanja ne prelaze 15% (petnaest posto) prosječne plate ostvarene u Distriktu za prethodnu godinu za petog i svakog narednog člana domaćinstva, u odnosu na višu najnižu platu;
- b) djeca rođena kao dvojke, trojke, četvorke ili više;
- c) djeca bez oba roditelja, djeca bez roditeljskog staranja, samohrani roditelj, porodice koje imaju dijete ometeno u fizičkom ili psihičkom razvoju, porodice u kojoj su oba ili jedan roditelj invalidi od I do VI (završno sa VI) grupe - kategorije ili s tjelesnim oštećenjem u procentu ne manjim od 70% (sedamdeset posto).

(3) Dodatak za djecu, iz člana 14 stava 2 tačke a) ovog zakona, nema građanin Distrikta koji ima registrovano privatno preduzeće, samostalnu radnju ili se bavi drugim vidom privatne djelatnosti koja podliježe plaćanju poreza ili paušala.

(4) Pravo na dodatak za djecu ostvaruje se samo po jednom osnovu iz stavova 1 i 2 ovog člana.“

Član 5

U članu 15 stav 1 se briše.

Stav 2 mijenja se i glasi:

„Djeca starija od sedam godina života iz člana 14 stava 2 ovog zakona ostvaruju pravo na dodatak za djecu ako se nalaze na redovnom obrazovanju u osnovnim, srednjim i višim školama, akademijama ili fakultetima, a najduže do navršene dvadeset šeste (26.) godine života.“

Dosadašnji stavovi 2, 3 i 4 postaje stavovi 1, 2 i 3.

Član 6

U članu 16 riječi: „dječiji doplatka“ zamjenjuju se riječima: „dodatak za djecu“.

Član 7

Član 17 mijenja se i glasi:

„Član 17

- (1) Pravo na dodatak iz člana 14 podnosilac zahtjeva ostvaruje nakon podnošenja zahtjeva sa potpunom dokumentacijom Odjeljenju za zdravstvo i ostale usluge, a najranije od 1. 5. 2026. godine.
- (2) Podnosiocu zahtjeva za ostvarivanje prava iz stava 1, a koji podnese zahtjev poslije 1. 5. 2026. godine priznaje se pravo od prvog dana u mjesecu koji slijedi nakon podnošenja zahtjeva s potpunom dokumentacijom Odjeljenju za zdravstvo i ostale usluge.”

Član 8

Član 18 mijenja se i glasi:

”Član 18

Iznos dodatka za djecu iz člana 14 zakona utvrđuje se Odlukom Vlade Distrikta, na prijedlog Odjeljenja za zdravstvo i ostale usluge, i isplaćuje se za svaki mjesec u toku kalendarske godine u utvrđenom novčanom iznosu, s tim da iznos iz člana 14 stava 1 ne može biti utvrđen u iznosu manjem od 50,00 KM.”

Član 9

Član 19 mijenja se i glasi:

„Član 19

Nadležni organ donosi rješenje o prestanku prava na dodatak za djecu kada:

1. dijete navrši 18 godina života,
2. dijete navrši 26 godina života ako su ispunjeni uslovi predviđeni članom 14 stavom 2, članom 15 stavom 1 i uslovi predviđeni članom 15a ovog zakona,
3. podnosilac zahtjeva izgubi prebivalište na teritoriji Brčko distrikta BiH,
4. dijete postane korisnik dječijeg dodatka u drugom entitetu ili državi,
5. dijete premine,
6. se utvrdi da je pravo ostvareno na osnovu netačnih ili lažnih podataka,
7. dijete zaključi brak ili postane roditelj,
8. dijete zasnjuje vlastito domaćinstvo ili postane finansijski samostalno,
9. se prilikom redovne kontrole utvrdi da dijete ili podnosilac zahtjeva ne žive na prijavljenoj adresi ili se radi o nestvarnom (fiktivno) prijavljenom prebivalištu radi ostvarivanja prava na dodatak za djecu,
10. se utvrdi postojanje drugih činjenica i okolnosti koje nisu izričito propisane ovim Zakonom a koje utiču na ostvarivanje prava.“

Član 10

Članovi 20, 21, i 22 se brišu.

Član 11

U članu 32 stav 2 mijenja se i glasi:

„(2) Potrebnu dokumentaciju čine:

- izvod iz matične knjige rođenih za svu djecu;
- kućna lista;
- uvjerenje iz Direkcije za finansije;
- izvod iz matične knjige vjenčanih (za članove domaćinstva);
- presuda o razvodu braka, u slučaju prekida bračne zajednice roditelja;
- presuda o povjeri djece na čuvanje i odgoj, u slučaju prestanka vanbračne zajednice;
- potvrda o redovnom školovanju za dijete (ili djecu);
- rješenje o kategorizaciji (ukoliko je prisutno u porodici dijete sa smetnjama u razvoju);
- ovjera prihoda članova porodičnog domaćinstva sa kućne liste (prihodi iz radnog odnosa, penzija i sl.);
- uvjerenje o nezaposlenosti sa Zavoda za zapošljavanje;
- izjava ovjerena od nadležnog organa da podnosilac zahtjeva nije korisnik dodatka za djecu u entitetima BiH ili drugoj državi.“

Član 12

U članu 34 dodaje se novi stav 2 koji glasi:

„(2) U slučaju neprijavlivanja promjene korisnik je obavezan da izvrši povrat neosnovano isplaćenih sredstava na jedinstveni račun Distrikta.“

Član 13

Iza člana 38 dodaju se novi članovi 38a i 38b koji glase:

„Član 38a

- (1) Korisnici koji su do dana stupanja na snagu ovog zakona ostvarili pravo na dodatak za djecu, nastavljaju da ostvaruju to pravo po odredbama zakona i podzakonskih akata donesenih na osnovu zakona.
- (2) Zahtjevi za ostvarivanje prava na dodatak za djecu koji su podneseni nakon stupanja na snagu ovog zakona, rješavat će se prema odredbama tog zakona.
- (3) Rok za donošenje rješenja za utvrđivanje prava po ovom zakonu:
 - a) 60 dana od dana podnošenja zahtjeva za nove korisnike,
 - b) 90 dana od dana primjene Zakona za dosadašnje korisnike koji su ranije ostvarili pravo.

Član 38b

Visina dodatka za djecu koju ostvaruju korisnici po propisima koji su važili do dana stupanja na snagu ovog zakona, uskladit će se sa visinom dodatka za djecu utvrđenom Odlukom Vlade Distrikta iz člana 18 zakona.“

Član 14

U članu 39 dodaje se novi stavovi 2 i 3 koji glase:

„(2) Vlada Distrikta donijet će Odluku iz člana 18 zakona u roku od 60 dana od dana stupanja na snagu ovog zakona.“

(3) Do dana početka primjene Odluke iz stava 2 ovog člana isplata dodataka za djecu vršit će se u visini utvrđenoj prema dosadašnjim propisima.“

Član 15

Član 40 mijenja se i glasi:

„Član 40

Do donošenja propisa i opših akata iz oblasti dječije zaštite kojima se uređuje primjena ovog zakona, primjenjivat će se propisi i opšti akti koji su se primjenjivali do dana stupanja na snagu ovog zakona.“

Član 16

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH, a primjenjivat će se od 01. 05. 2026. godine.

Broj: 01-02-2386/25
Brčko, 17. 12. 2025. godine

PREDSJEDNIK
SKUPŠTINE BRČKO DISTRIKTA BiH
Damir Bulčević, dipl. oec., s.r.